



UN VISITA A UN FABRICA DE BONBONES

Le narrator: *Le tres amicos Anna, Petro e Paulo ha decidite ir a un excursion a bicycletta. Isto es le prime vice, e le tour va a Bornholm, un insula danese situate al sud de Svedia. Bornholm es atypic pro Danmark, proque il ha roccas – e assi anque grande differentias in le altitude del paisage. Isto demanda bon musculos del gamba. Post un belle tour preter le costa le tres amicos arriva al placia central in le parve urbe idyllic Svaneke.*

Paulo: Oh, finalmente, stop! Mi gambas dole. Que nos stoppa ci e prende un pausa, per favor.

Anna: De accordo, io anque es ben fatigate e pote usar un pausa. Le sol es phantastic, ma un poco de vento haberea essite agradabile.

Petro: Si, ma le tour preter le costa esseva meraviliose. Le mar es blau e belle, e il es agradabile que le pistas pro bicyclettas sempre da un belle vista.

Anna: Ma isto anque es belle. Vide! Un placia bellissime con parve casas orange-jalne e rosastre. Que nos parca nostre bicyclettas ci.

Paulo: No, que nos parca nostre bicyclettas *la* – ante le fabrica de bonbones. Isto es exactemente lo que io besonia ora: sucro!

Petro: Bonbones, si! Que nos entra e vide le production.

Narrator: *Felicemente Anna, Petro e Paulo ha arrivate durante que le production es in plen funcionamiento. Il ha numerose personas in le parve boteca, e omnes regarda como le bonbones es create.*

Anna: Petro, pote tu mover un poco, per favor? Io non pote vider, proque il ha un homine multo alte ante me.



Petro: Naturalmente, Anna, nos cambia nostre positiones, assi que tu pote vider toto.

Paulo: Isto es vermente fascinante. Como es il possibile controlar que le colores del bonbones remane separate, assi que on pote crear motivos? Io non lo comprende.

Petro: Audi, io ha trovate un explication in Internet per mi smartphono. On dice al sito del fabrica de bonbones assi: “Quando on debe producir un bonbon, le massa de bonbones debe primo cocer. Allora le massa es effundite sur le grande tabula de ferro refrigerate per aqua, e on adde gusto e color. Le massa es ora refrigerate e obtene un consistentia apte. Allora le massa debe esser tirate supra un croc. Isto es labor dur e calide. Quando le massa obtene le color clar, il es tempore pro adder le designo.”

Anna: E vide! Ora illes rola le massa cautemente in un sorta de salsicia que es placiate in un machina que lo preme ben.

Paulo: E ora illes tira le massa a in un longissime salsicia e seca le bonbones.

Petro: Se dice ci que iste fabrica produce sex milliones bonbones per anno!

Anna: Sex milliones, guai!

Paulo: E vide, ora le publico pote gustar ... non sex milliones ma alcun del bonbones. Io crede que istos es con liquiritia.

Anna: ... que, per hasardo, es un de mi

favoritos! Forsan io pote prender duo?

Petro: Io pote prender uno e dar te le mie, nam io non ama liquiritia, mesmo si le motivo es impressionante.

Paulo: Nos pote ir in le boteca detra le grande fenestra. Io es secur que nos pote trovar altere bonbones pro te, Petro.

Anna: ... e pro me! Io ama bonbones!

Paulo: Isto nos sape!!!

Narrator: *Ante que tote le altere spectatores ha le mesme idea, le tres amicos hasta per le porta a in le boteca pro seliger un cornetta de bonbones. Il ha bonbones in multissime colores, con multissime gustos e con multissime diferente designos. – Post un quarto de hora illes quita le boteca, cata uno con lor cornetta plen usque al bordo.*

Anna: Hurrah, un tresor de bonbones de mi gustos favorite.

Petro: Tu pote haber un ab mi cornetta, si il ha qualcosa ci que tu desira gustar.

Paulo: Isto es un offerta riscose. Io es secur que Anna desira gustar *tote* le bonbones!

Anna: Non los con caramello!

Petro e Paulo: Ha ha ha!

Paulo: Es vos fresc de novo, assi que nos pote bicyclar ancora un distantia?

Petro: Si, ma non debe nos gauder del bon die e del bon bonbones?

Paulo: “Bon bonbones” – io ama iste expression.

Petro: Io desira ir al roccas. Illos es calide e agradabile, quando le sol brilla como hodie. Non debe nos ir e baniar in le mar?

Anna: Un eccellente idea! Alora nos pote mangiar nostre bonbones in le pausas inter le baniar.

Paulo: E quando nos non vole baniar plus, nos debe visitar un casa pro fumar e gustar le haringos fumate. Isto appare deliciose sur le photos.

Anna e Petro: De accordo! E ora: Al mar!

HARINGOS FUMATE

Fumar es un maniera de conservar comestibiles. On pote fumar salsicias, gambon e pisces. Le haringo fumate es un specialitate sur Bornholm. On usa ligno de alno. Le haringo fumate obtene un aspecto quasi auree. Illo es un delicatessa – ma presta attention al spinas! Illos non es agradabile in le gorga.





UN VISITA A UN FABRICA DE BONBONES

1 Il ha multe differente typos de sucreria. Qual es qual?

meringue al chocolate – sugetta – bonbones – caramellos – cornetto de gelato



Qual es tu favorito – e proque?

2 Ecce un mappa de Bornholm. Explica, ubi se trova le urbes per usar le punctos cardinal, p.ex.: *X es situate al nord de Y.* Ecce un mini-vocabulario:

nord, nord-est, nord-west, nord-nord-est, nord-nord-west, est, sud, sud-est, sud-west, sud-sud-est, sud-sud-west, west

E alcun distantias: Rønne-Allinge 23 km, Rønne-Aakirkeby 16 km, Rønne-Dueodde 29 km, Rønne-Svaneke 30 km, Rønne-Gudhjem 25 km, Rønne-Nexø 30 km, Allinge-Gudhjem 18 km, Allinge-Aakirkeby 29 km, Allinge-Nexø 39 km, Allinge-Dueodde 48 km, Svaneke-Nexø 10 km, Svaneke-Gudhjem 18 km



3 Associa cata parola con un expression o un synonymo.

- | | |
|--|---|
| 1. <input type="checkbox"/> liquiritia | A. inclinar assi que un liquido pote fluer ab p.ex. un vaso |
| 2. <input type="checkbox"/> fumar | B. un arbore con folios in le forma de ovos |
| 3. <input type="checkbox"/> rocca | C. un pisce que es appellate “le argento del mar” |
| 4. <input type="checkbox"/> preter | D. un medio de transporto con duo rotas e un guida |
| 5. <input type="checkbox"/> quarto de hora | E. un molle massa nigre e salate que multes ama mangiar |
| 6. <input type="checkbox"/> haringo | F. de un color rubie clar |
| 7. <input type="checkbox"/> effunder | G. al longe de, sequente le bordo de |
| 8. <input type="checkbox"/> bicycletta | H. un enorme petra, sur le qual on pote star |
| 9. <input type="checkbox"/> alno | I. accender ligno assi que un nube nigre-gris appare |
| 10. <input type="checkbox"/> rosastre | J. dece-cinque minutas |

4 Responde al questiones:

1. Que es special pro Bornholm?
2. Proque fuma on le haringos?
3. Qui non ama liquiritia? E qui ama lo?